

14. august 2026

UKA 2026/258

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Aallarnisaasunut nuna tamakkerlugu ukiumoortumik Nersornaasiisarnermik pilersitsinissamik, Naalakkersuisut peqquneqarnissaannik Inatsisartut aalajangiiffigisassaattut siunnersuut. Naalakkersuisut unammisitsineq kisiat aqqutissiuutissavaat, tassanilu akissarsiaasinnaasut, agguaassinerusinnaasut, angalanerusinnaasut, assigisinnaasaallu suliffeqarfinnit namminersortunit, aaqqissuussisimanernit, aningaasaateqarfinnit imaluunniit avataani suleqatigisanit aningaasalersorneqassallutik.

(Inatsisartunut ilaasortaq Napaartoq Isak Petrussen, Demokraatit)

Tunngavilersuut

Maani aallarnisaasut amerlanerusut pisariaqartippagut. Inuit suliniuteqarnissamut, suliffimmik aallartitsinissamut, aaqqiissutissanillu nutaanik pilersitsinissamut sapiissuseqarlutik siuariartortitsinermut, suliffissanullu tapersiisinnaasut.

Demokraatini isumaqarpugut inuussutissarsiutinik ingerlatsinerup nukittunissaanut, uummaarinnissaanullu aallarnisaasut aalajangiisuusut. Ingerlatsinermik, ineriartornermik, periarfissanillu nutaanik pilersitsisarput.

Tamanna pillugu siunnersuutigaarput, ukiumoortumik nuna tamakkerlugu Aallarnisaasunut Nersornaasiisoqartalissasoq.

Aallarnisaanerup ersarinnerulersinneqarnissaa, aallarnisaanissamullu amerlanerusut isumassarsitinneqarnissaat siunertaavoq. Unammisitsinermi taamak ittumi aallarnisaasut isumassarsiaminnik, suliffeqarfimminnik, nutaaliaasumillu aaqqiissutiminnik saqqummiinissaannut periarfissiisinnaavoq. Tassaasinnaapput inuusuttut ingerlatsinissamut nutaanik isumassarsiallit, nunaqarfinni suliffeqarfiit mikisut, aallarnisaasutut ingerlareerlutik siuartornissamut periarfissallit imaluunniit najukkami unammillernartunut inuit aaqqiissutissanik ineriartortitsisimasut.

Inuussutissarsiutinik ineriartortitsinissamik pisariaqartitsineq inuiaqatigiittut eqqartortuartillugu, ilutigisaanik ineriartornermik pilersitsisut saqqummiunneqarnissaannut annerusumik iliuuseqartannginnerput ilumoorsinnaanngilaq. Aallarnisaasunut Nersornaasiineq maligassiuisussanik pilersitsisinnaavoq. Suliffeqarfiit maluginiarneqalersinnaapput. Aallarnisaasut, inuussutissarsiutillit, aaqqissuussisimanerit, aningaasaliisartut, siunnersortillu akornanni attaveqatigiinneq aamma nukittunerulersissinnaavaa.



DEMOKRAATIT

Unammisitsinerup nuna tamakkerlugu pisarnissaa pingaaruteqarpoq. Nuna tamakkerlugu, suliaqarfinnilu tamani aallarnisaasoqartarpoq. Kinaluunniit isumassarsialatsiaqarsinnaavoq, tamannalu aallarnisaasunut nunami unammisitsinerup ersersissinnaasariaqarpaa.

Siunnersuut aningaasatigut illersorneqarsinnaasumik ingerlanneqassaaq. Namminersorlutik Oqartussat unammisitsineq aqutissiuutissavaat, sinaakkutit pilersissavaat, ingerlatsisussallu naleqquttut katersussallugit. Akissarsiaasinnaasut, agguaassinerusinnaasut, aningaasaliinerusinnaasut, angalanerusinnaasut, assigisinnaasaallu suliffeqarfinnit namminersortunit, aaqqissuussisimanerit, aningaasaateqarfinnit imaluunniit avataani suleqatigisanit aningaasalersorneqassapput.

Inuussutissarsiorfiit, aaqqissuussisimanerillu attuumassuteqartut qanimut akuutinneqarunik pissusissamisuussaaq. Nutaaliornerup, suliffeqarfiit nutaat, najukkamilu inuussutissarsiutinik ineriartortitsinerup nukittorsarneqarnissaa tamat soqutigisariaqarpaat. Taamaallilluni pisortat ingerlatsisunut katersuutsitillugit, avataanilu suleqatigisat aningaasatigut tapiissuteqartittarlugit Aallarnisaasunut Nersornaasiisarneq pisariitsumik, ersarissumillu suleqatigiiffiulersinnaavoq.

Demokraatit isumaqarput, misiliisut nersortariaqarigut. Iluatsittumik ingerlatsisut akuersaartariaqarigut. Suli aallartinngitsut isumassarsitissagigut.

Tamanna tunuluaqutaralugu neriutigaara Naalakkersuisut, Inatsisartunilu partiit sinnerisa siunnersuut tapersersussagaat.

Pisortanut aningaasatigut allaffissornikkullu kingunerisassai

Siunnersuut iluatsissappat, ukiumoortumik Aallarnisaasunut Nersornaasiisarnerup pilersinneqarnissaa Naalakkersuisut aqutissiuuttariaqarpaat. Tamanna allaffissornikkut, aningaasatigullu sinaakkutit piusut iluini pisinnaasoq nalilernerqarpoq. Taamaakkaluartoq aallartisarnermut atatillugu ilinniagartuup ukiumut silinerata sisamararterutaanik (125.000 koruuninik) immikkoortitsisoqarnissaa pisariaqartinneqassaaq.

Akissarsiaasinnaasut, agguaassinerusinnaasut, aningaasaliinerusinnaasut, angalanerusinnaasut, assigisinnaasaallu suliffeqarfinnit namminersortunit, aaqqissuussisimanerit, aningaasaateqarfinnit imaluunniit avataani suleqatigisanit aningaasalersorneqassapput. Tamanna pillugu siunnersuut pisortanut qaavatigut annertuumik aningaasartuutaassangatinneqanngilaq.

Namminersortunut aningaasatigut allaffissornikkullu kingunerisassai

Aallarnisaaneq, nutaaliorneq, suliffeqarfiillu nutaat pillugit ersarinnerulernermik siunnersuut pilersitsisinnaammat siunnersuut namminersortunut pitsaasumik kinguneqarsinnaavoq.

Suliffeqarfiit namminersortut, aaqqissuussisimanerit, aningaasaateqarfiit, avataanilu suleqatigisat allat namminneq kajumissutsiminnik aningaasaliissutinik, akissarsiassanik, siunnersuineramik imaluunniit



attaveqaatissanik tapersiinnaapput.

Innuttaasunut aningaasatigut allaffissornikkullu kingunerisassai

Siunnersuut aningaasaqarnikkut imaluunniit allaffissornikkut innuttaasunut kingunissaqanngilaq.

Siunissaq ungasinnerusoq eqqarsaatigalugu aallarnisaasut amerlinerinut, suliffeqarfinnut nutaanut, suliffissanullu amerlanerusunut siunnersuut tapersiissappat siunnersuut toqqaannanngitsumik pitsaasumik sunniuteqarsinnaavoq.